

胡文忠公遺集

胡文正公遺集卷二

長沙鄭敦謹

編輯

湘鄉曾國荃

陳奏水陸雕剿咸蒲竄匪均獲勝仗並北岸水

陸連日獲勝現在會議剋期進剿疏

六月十四日

臣於五月二十九日將十五日金口大獲勝仗情形

由驛馳奏在案六月初六日接奉 上諭胡林

翼奏武昌連次獲勝情形各摺片覽所奏軍情武漢  
城勢尙形猖獗該署撫所帶兵勇旣形單薄自未便

再行分撥惟當就現有兵力速籌勦辦潰敗兵勇隨時裁汰應如何添補助勦並著妥籌辦理等因欽此仰見

聖謨廣運欽感難名

臣

於五月二十日派

令都司劉培元守備張榮貴等各挑水師四百名從九丁銳義代理江夏縣知縣邢高魁千總余玉興把總張勝奎州同伍典等挑帶陸勇千五百名入湖雕勦又恐敗賊回竄復派廩生喻燾帶勇四百名赴山坡一帶堵勦五月二十六日丁銳義等馳至孟家嘴地方探聞敗賊由山坡竄入咸甯縣境滋擾劉培元卽率水師沿湖搜勦丁銳義等率陸勇夾擊該匪竟

敢聚眾迎拒，奈玉興等分路抄襲賊，後前後後夾擊水師。從中橫截賊，乃大潰，殺斃二百二十名，生擒十二名。餘匪逃入蒲圻地界，適總兵銜副將楊載福先在岳州防勦，親督舢板由六溪口駛入蒲圻，賊不意水師從上驟至，望見驚潰，追斬頗多。餘匪翻山逃散。卽於次日收隊出江，其馳赴山坡之廩生喻燾亦於二十七日探實，僞監軍單金榜率匪占踞清靜寺，分起擄掠。喻燾督勇夜行三十里，出其不意，將清靜寺四面圍勦。賊開門撲出，我軍在前者奮力堵殺，在後者登屋拋擲火罐，立將僞監軍單金榜生擒，解營正法。

餘賊無一得脫解驗首級一百五十餘顆燒斃更多  
附近村莊逐一搜查並無餘匪藏匿臣查金口剿敗  
之賊分股上竄又經水陸會剿獲勝餘賊竄散勢已  
不多惟尚有另股由興國州一帶擾入江西義甯武  
甯地界誠恐會合爲一分擾通崇及岳州平江等處  
臣之兵力尙難襲遠且武漢爲重先務爲急分剿之  
兵業已旬日在外應卽札飭回營仍一面飛咨湖南  
妥爲防範此南岸分剿之實在情形也水師連旬以  
來凡遇北風之日力攻漢陽及鮎魚套賊船賊之戰  
艦擊匿不出迭次轟斃多賊而究未可奪其堅守之

卡忽於本月十二日北岸漢陽賊匪分股上撲朝關  
宮卡細爲審察尙是疑兵之計實則潛以小划百餘  
隻由湖內暗襲沌口及蔡家嶺營盤副將王國才派  
兵迎戰記名知府彭玉麟分派水勇登岸助戰署臬  
司李孟羣先令游擊何越珽密拖舢板船隻備於湖  
內王國才亦飭守備陳慶有先期置備小划多隻載  
川勇之習水戰者藏於湖汊迨賊划逼近以舢板衝  
鋒小划繼之賊勢不支旋即敗退奪獲小划多隻十  
六日又據王國才稟稱漢陽賊匪三千餘人潛山蔡  
店繞出後路攻撲參山參將札勒罕縣主簿魏喻義

各督兵勇分途堵禦該匪勢甚兇猛該參將等奮力  
迎擊鏖戰數時始行擊退殲斃賊匪二百八十八名  
生擒長髮老賊二名我軍陣亡帶傷者僅止十五名  
是夜賊退李家集地方該參將等卽令軍士造飯準  
備夜戰十七日四更時分賊果分數路竄進檀樹坳  
扎勒罕魏喻義激勵兵勇左右衝殺都司石清吉遊  
擊烏凌阿等復由蔡家嶺赴援代理漢陽縣知縣伍  
繼助調集團練助戰賊乃大潰殲斃賊匪百餘人奪  
獲大黃旗四桿馬二匹該匪仍退至李家集夜探漢  
陽城內出賊一千餘人會同李家集之賊約共四千

餘人又有另股四五百人由繫馬口茶湖下竄班集  
另股由馬家渡擄船下竄新集同撲麥山臣卽飭扎  
勒罕魏喻義等仍分數路以禦之十八日天甫微明  
賊果大至彼時各鄉新起團練一呼卽至彌山彌谷  
約有三萬人該匪分襲麥山繞出水陸之後蓋亦探  
知後路兵勇不多乘虛而入初不料團練之眾旗幟  
如林賊見我軍勢盛不戰自退此北岸堵剿之實在  
情形也時方溽暑軍士曝於日中且有病暈於路者  
至新集團練可使助威而不可使浪戰誠恐訓練未  
精戰陣未習設有挫敗民心卽爲動搖大局轉形渙



散故必善藏其用而慎使之不宜遽以鄉民遠追窮寇臣思漢陽一隅之地初辦團練卽能以三萬人協力堵禦使賊驚潰不敢內犯足見該士民志切同仇殊堪嘉尙再查水師數月以來大小二十餘仗扼守長江使賊不敢上竄沿江之地尺寸未失前此船隻破損兵力單微尙能堅定不移今復迭次破賊均經陸續馳奏在案可否查明水陸尤爲出力弁勇及督辦團練士民分別奏請獎勵以作士氣出自

皇上逾格恩施又探聞

欽差大臣察哈爾都

統西凌阿已入楚境湖廣督

臣

官文由襄陽中路可

至潛沔兼顧荊州門戶常德副將楊載福由岳州統帶水師六月十六日已抵金口經臣面察情形水師兵力更強近日上游賊匪紛紛竄歸武漢者甚多臣當細意體察形勢所宜決計深入力戰並即趕緊知會署臬司李益羣副將王國才楊載福記名知府彭玉麟剋日進攻以期仰慰 聖懷再臣營兵力雖不甚厚上歷 聖慈諭飭妥籌辦理臣細意體察凡兵勇勝負之數不在多寡而在勇怯勇怯混淆兵多亦弱勇怯分明兵少亦強且兵多則餉多刻下水陸餉項積欠已至五十六日不等未可再行添募

轉致餉糈支絀合併附陳

硃批知道了著準其擇尤保奏

特參提督違例需索請

旨嚴行查究疏

六月

二十四日

竊查軍興數年供億浩繁度支告匱我

皇上宵

旰憂勤躬行節儉卽在廷王大臣以下無不捐省廉  
俸以濟軍需凡在外大小臣工自宜加意撙節以濟  
時艱且正項餉需尙多欠缺惟當曉諭大義共期奮  
勉豈能縱容兵勇專以財利爲事又查定例防勦本  
省官兵向無行裝銀兩及例外口糧推原创意原以

本省弁兵奉文防剿道里不遠職分當爲故不準支  
給行裝等項本年前督臣楊需咨調署理提督訥欽  
挑帶兵丁千餘名防剿粵匪該署提督訥欽卽坐索  
行裝銀兩兵不滿千費至萬金以外又據署襄陽縣  
知縣王璐稟稱提督訥欽帶兵防堵遵卽照例雇備  
船隻先期齊泊河干伺應提督啟行忽有兵丁多人  
扭毆埠頭將范廷鑑右眼胞王國富左腮腴顏宗思  
左肋李作霖項頸等處毆傷又於二十日署提標前  
營都司多恩帶兵三百六十名起程仍飭丁役照前  
雇船應付多恩聽信兵丁慫恿逼勒水手聚眾逞兇

並在沿河客船肆行滋擾結隊成羣必欲另行雇覓該都司所求不遂復喝令兵丁將差總王安毆打致傷遍體稟請道府就近查驗等情並準前督臣楊需及新任督臣官文函稱該提督所帶之兵並不得力需索行裝實違定例各情臣復查前西安將軍扎拉芬忠勇激烈一時名將孤軍力戰二日之久該署提督近在咫尺並不發兵應援且見賊先潰惟恐不速乃當州縣殘破餉項支絀之時方且例外需索是其志在得財不在殺賊已可概見前侍郎臣曾國藩奏稱湖北兵勇不可復用並備陳三年以來五次大潰

等情臣查湖北之額兵不實營政久弛臨事則招市人而冒充之以致聞風先逃恬不爲怪侍郎臣曾國藩前次陳奏均係實在情形兵勇之不強責在將帥此皆督撫提鎮有兵政之責者之罪該署提督總兵訥欽不知引以爲恥方且因以爲利是誠何心臣上年隨同提臣塔齊布之後見其所帶兵勇經過州縣絲毫無擾與地方官絕不干涉並無應付且互相稽察惟恐稍有侵害致損聲名可見凡兵勇之志在殺賊者必不屑以擾民爲事而其志在得財者又必不能以殺賊爲事此固理勢之必然者也合無仰懇

皇上天恩敕下督臣官文就近將署提督訥欽  
及隨行將弁切實查究一弁從嚴參革其不能得力  
之兵丁及早遣散分別裁汰以飭戒行而儆官邪

再臣

於六月初六日接奉

上諭據御史張駿奏

請實行鄉團以節糜費等語并著該署撫飭屬妥辦  
總在體察民情慎選收令固不得視爲具文亦不可  
拘泥成法等因欽此臣查團練之效外可助官軍之  
聲威內可消宵小之隱慮救時之策此爲先務惟團  
練爲治鄉之要亦與吏治之用人兵政之選將相似  
假如州縣不得人則州縣之事必壞營伍之將領頭

目不得人則兵勇必潰團練亦然以正士良民爲一團之長則一團之民皆可禦侮以劣生莠民爲一團之長則一團之民可使抗糧犯法可使攘奪爲亂假鄉民以兵刃而官吏不能躬親董勸旌別淑慝則目前之成效難期而日後之流弊滋甚 上諭以體

察民情慎選牧令爲訓

聖慮周詳無遠弗屆實

已洞察利弊綱舉目張

臣

查代理江夏縣知縣江世

玉本年二月先期藉勸捐出城捐項既無所得而城池已失臣面諭其隨營效力則以不能久住帳房爲詞且任事已久於江夏縣團練毫無布置是其心存



狡猾性耽安逸已屬不堪造就咸甯縣知縣莫若璣  
年力已衰耳目昏瞶團練廢弛不堪振作嘉魚縣知  
縣李文灝於團練事宜漫不經心且縱容差胥需索  
團費尤爲謬妄以上三員均應請 旨革職惟 臣

南岸一軍州縣乏人查有揀發知縣黃昌輔人尙明  
白堪以委署嘉魚縣事責飭速辦團練又隨營湖南  
慈利縣大挑二等舉人揀發知縣邢高魁心地樸實  
膽識亦優在籍辦團已著成效惟委署地方與例不  
符札委暫行代理江夏縣專辦團練事宜咸甯縣一  
缺尙無可委之員已函商督 臣 酌定委署理合附

奏

上諭胡林翼奏查參知縣各員請旨革職等語 江世玉  
莫若璣李文灝均著卽行革職餘著照所議辦理該部  
知道欽此 七月初八日奉

馳報進剿漢陽連獲大勝水師勞績尤著請先  
行獎勵疏 八月初三日

臣於六月二十四日將雕剿咸蒲竄匪并爹山開仗  
獲勝各情具 奏在案探據漢陽蔡店賊匪屢次大  
股犯撲爹山各營副將王國才馳救二次賊匪退走  
臣於七月初旬渡江渡湖馳救二次知該匪必欲竄

據此地意圖撓大軍餉道又可侵荊州要津兼與德安之賊聲氣聯絡此股賊匪非加痛勦不足以遏其兇鋒况蔡店爲咽喉重地若能及早克復則該逆之糧道已斷南北之往來難通臣於七月初五日帶兵千餘渡江擊退之後初六日仍回金口初八日探稱賊匪又領大股來犯臣思往返馳援不如深入力戰卽飭雷勇丁三千餘名防守金口并交署臬司李孟羣管帶卽調水師左營知府彭玉麟帶領舳板礮船由沌口繞出蔡店臣親督各勇四千名於七月初九日寅刻渡江渡湖已刻始至黃陵磯而麥山各營已

敗守備銜周得魁等督率勇丁馳援殺倒騎馬衝鋒  
賊目副將王國才亦從旁路馳至賊卽敗潰我軍乘  
勝追殺五里十一日拔營進抵東山十二日該逆又  
由蔡店分五路而來直撲我營臣卽飭各勇分五路  
以待之俟其逼近乃親督各勇鼓行而前連斃騎馬  
衝鋒悍賊三名該逆等拒敵不退我軍奮力爭先刀  
矛交鋒鏖戰一時之久殺斃賊匪百餘名賊勢已挫  
我軍一齊乘勝衝殺直通蔡店沿途殺斃及溺斃賊  
匪約二千餘人殺馬賊王各奪獲鎗礮器械無算敗  
匪沿河逃竄適左營水師陳彭玉麟帶同後營都

司張啟基中營都司銜守備鮑超各領舢板礮船由  
沌口繞入經過爛泥港金牛港水深不逾五寸寬不  
逾丈行運頗難各營哨官及勇丁等跣足拖撻更替  
牽挽十二日午刻行抵蔡店知府彭玉麟都司銜守  
備鮑超都司銜守備孫昌凱已保守備銜千總黃開  
進催漿前進黃開進首先開礮轟斃騎馬黃巾賊目  
一名鮑超卽督水勇登岸追殺而陸軍各勇亦復四  
面圍攻斬殺又約三百人隔洲襄河內駛出賊船數  
隻都司張啟基守備孫昌凱開礮將賊船轟翻餘賊  
盡行覆溺蔡店卽時克復按家搜查并無匿匪此十

二日水陸大獲全勝克復蔡店之實在情形也十三日臣督各營前進知府彭玉麟等仍畱蔡店搜捕襄河上游瀕口一帶地方以防後路沿途僅轟斃散賊數十名十五日卯刻臣營及水師各營齊至漢陽上之十里高廟紮定水陸並進分攻漢陽漢鎮知府彭玉麟領帶水師前進至北岸宗關賊圍大石城一座約賊數百餘人高立望樓內安大礮數尊從左邊轟擊南岸慈渡庵亦圍大石城一座約賊百餘人高立望樓安礮從右邊轟擊左右夾守欲使我軍不能前進知府彭玉麟派守備鮑超帶舢板十餘隻攻北岸

宗關賊城派都司張啟基帶舢板十餘隻攻南岸慈  
渡庵賊城彭玉麟親督各營直衝中鋒開礮轟擊一  
時之久斃賊數十名宗關之賊敗退守備鮑超卽督  
水師登岸追殺生擒長髮老賊十餘名當卽正法并  
獲大礮三尊而宗關之石城已被都司張啟基見慈  
渡庵賊城死拒卽將礮船馳赴下游轉舵上攻彭玉  
麟督左營接應之船自上游分勇登岸我軍勢盛前  
後來擊而慈渡庵之石城立破營棚牆壘悉數燒燬  
殺賊百餘名生擒長髮老賊八名斬之奪獲大礮四  
尊大黃旗四面騾馬共六匹彭玉麟卽乘勝揮旗進

至南岸五顯廟此處爲漢陽城外賊目之總巢穴周圍十餘家皆崇墉高垣其堅如城賊用大木作椿密竹作鐵壘石爲卡四面阻湖環以大礮路徑只容一人險不可踰而賊之戰船快蟹長龍舳板盡泊其下我軍奮力齊進賊卽排放大礮哨官藍翎千總蔡宏元礮穿其胸卽時陣亡藍翎外委已保把總劉大順礮中其股受傷甚重知府彭玉麟號於眾曰已入虎穴非血戰不能出險成功隨派哨官已保守備藍翎千總黃開進六品軍功曹德明劉世玉已保藍翎把總外委喻俊明藍翎千總蘇在位已保藍翎把總外



委劉連升藍翎把總張開榜等共帶舢板十二隻請  
囑各營哨官不準開礮搖旗魚貫由北岸左邊直衝  
而下抄出五顯廟賊船之後迅奔南岸大礮齊施復  
派都司銜守備鮑超帶舢板八隻自上游斜渡作欲  
渡急攻之計以牽賊勢黃開進等卽合力催槳直衝  
賊船之尾火蛋火箭一齊施放奮勇撲上賊船賊船  
之泊南岸者悉數奪獲賊皆紛紛投河死者無數彭  
玉麟卽催大隊前進齊撲賊船奪獲大礮六尊燒燬  
賊卡一座并奪快蟹三隻舢板五隻大礮六十餘座  
復督隊直下蘇斃岸城甚多舟至漢鎮賊仍用快蟹

長龍橫河中流開礮上犯彭玉麟卽派孫昌凱黃開  
進易光南黃先敦由南岸進鮑超張啟基由北岸進  
讓出中流任賊船上駛我軍已出賊船之下兩岸包  
轉將賊船圍住鮑超奮力首先奪獲賊快蟹二隻張  
啟基奪獲賊快蟹一隻長龍一隻彭玉麟奪獲賊長  
龍一隻賊盡撲水有被我軍矛殺者有被生擒者亦  
有浮水仍登南北兩岸逃竄者我軍乘勝直出襄河  
口賊以鐵索貫廢船七隻橫作浮橋攔截河道以舢  
板七隻護之舢板之後則賊之一切輜重船隻約三  
百餘號南北兩岸復多悍賊施放鎗礮拋擲火蛋火

箭拒守浮橋彭玉麟派張啟基帶六品軍功候補外  
委危廷貴六品軍功梁昌周得勝韋尙爵鮑超帶已  
保藍翎把總外委瞿定國已保千總藍翎外委何瑞  
祥鄭陽和六品軍功王鳳岐成發翔守備黃開進孫  
昌凱等一鼓前進用大斧鋼鑿直冒礮煙之中斬斷  
浮橋鐵索浮橋一時盡散當卽奪獲賊舢板七隻其  
賊舟艦重三百餘隻悉數焚燒賊眾入水淹斃者不  
計其數彭玉麟卽督各營登岸攻入沿途賊巢燒賊  
鑄礮局五座獲礮二百餘尊又燒賊火藥局六座火  
焰迷天徹日不止隨卽打出襄河口破賊大石城二

座獲大礮六尊時已酉刻仍將各營戰船收入襄河  
泊於永甯巷乘夜搜捕漢口餘匪生擒僞官蕭朝富  
僞軍師吳會元僞木將軍李姓等并長髮二百餘名  
立即盡數正法奪獲騾馬十餘匹黃旗黃帽紅袍號  
褂無數時已二更而南岸之賊死灰復然仍踞五顯  
廟施放鎗礮火箭以拒我師至五更時分賊忽失火  
然燒藥桶我軍乘機登岸追撲逢賊即斬遇屋即燒  
遂燬五顯廟所踞巢穴餘匪悉竄入漢陽城內十六  
日辰刻復派左營舢板十隻後營舢板六隻中營舢  
板八隻進攻南岸嘴晴川閣一帶撲去賊木城二座

燒燬賊踞民房巢穴百餘家至未刻收隊仍泊襄河  
內永甯巷十七日賊於永甯巷對面之南岸忽築土  
牆意欲安設大礮對擊我軍使不能灣泊我軍奮力  
登岸三擊三勝并奪獲馬三匹騾一匹生擒長髮老  
賊四名斬之襄河稍爲肅清十八日因漢口無兵鎮  
守民房被賊延燒南北受敵而黃州賊船數百隻來  
援武漢乃駛出外江會合總兵銜常德副將楊載福  
直赴下游迎剿十九日各營進至葉家洲見賊船數  
百號泊於山下乘其不備燒賊船二百餘號其餘賊  
船盡數奪獲旋即回陽邏灣泊二十一日仍紮沙口

扼守中流使賊上下船隻不能往來二十二日副將  
楊載福派都司鮑超守備李濟清搜查漢口後湖行  
至該處河道窄淺戰船不能運動仍出沙口駐紮二  
十五日始歸沌口老營此知府彭玉麟等由沌口入  
襄河血戰十日之實在情形也先是十五日副將楊  
載福在外江率同右哨游擊李成謀前哨都司張榮  
貴中哨守備萬化林等直搗塘角賊船其燒賊長龍  
舢板十一隻糧船二百餘號并直攻小河口以引內  
河水師出江因糧米軍火缺乏幸奪下游援賊之舟  
以資軍用二十三日同泊沙口外江二十四日之夜

狂風大作師船飄蕩不能穩紮遂乘風上駛武漢城  
下賊礮齊施并開快蟹長龍橫截中流放礮死拒我  
師舳板於狂風巨浪之中左右迎敵斃賊無算藍翎  
守備銜千總黃開進被賊礮穿胸陣亡六品軍功蔣  
青海王鳳岐樊丙南何肇昌等均被賊礮打翻舳板  
船隻落水陣亡勇丁溺斃共二三百名此又副將楊  
載福從十五日至二十四日外江夾攻經旬苦戰之  
實在情形也臣查漢陽一城外江內河湖水又環繞  
其中而賊於附城四面堅修溝壘上架大礮近城橋  
梁均被折斷下埋地雷上懸滾木雖有一綫湖隄而

道路可行之處曲折紆回跬步皆窘大別山峙於城北陷坑尤多木城二座內架大礮十餘尊排列三面皆可轟擊有賊二百餘人然火相待其山腳空斷徧釘竹籤鐵片使人不能飛越山頂亦有石城一座上有老賊數百人以死拒守臣於十五日將陸軍分作三隊臣親督寶勇安勇等繞攻大別山又派仁勇鳳勇等由龍燈隄進攻西門又派質勇甯勇等作爲後路接應并飛飭副將王國才由沌口帶兵前進協同圍剿經過各處要隘逆賊以巨礮拒守臣營各勇奮不顧身操戈直前登壘一呼賊眾喪膽連破賊壘三



處麾兵直抵大別山山頭礮石對擊前隊哨官李文盛李運絡等業已乘勢入城街中伏賊衝出抵死相拒我軍力戰多時斬殺雖眾究未能即時遽破整旅回營時已昏暮十六日復領軍進剿該逆半途迎拒我軍殺賊百餘人賊仍分支迎拒左路安黔甯鳳各營之勇有退卻里餘者狹路擁擠至臣軍亦卻二里餘仍督隊追轉迎殺賊乃堅閉不出十七日稍息兵力十八日臣統各營馳剿該逆勢已不支奔竄入城正擬直逼坡下適值下游竄匪潛赴漢口延燒民房水師爲火氣所逼不能中立又下游黃州賊船上駛

馳出大江

臣

軍卽趕修牆壕日夜謹守十九日至二

十五日屢次誘戰賊竟堅閉不出十五十六十七日

副將王國才屢由沌口出隊力攻漢陽南門外賊壘

共斃賊匪二百餘名傷亡勇丁約三十餘名賊壘甚

堅遠難得手二十六日賊知水師已回沌口於黎明

時約有三千餘人分三路來撲

臣

營餘賸逆船駛入

內河對營轟擊

臣

之左右均被中傷數名

臣

軍嚴陣

以待相持片刻卽鼓譟而進擊斃長髮十餘名賊眾

返奔

臣

軍乘勢追殺約三百名賊船亦同時下竄二

十七日卯刻復犯

臣

軍卽飭守備銜千總周得魁何

紹彩主簿魏喻義等穩紮於路南千總奈玉興把總  
吳璘等穩紮於路北前後多派接應有騎黑馬賊僞  
冬官右丞相劉姓者衝鋒前來悍賊踵至臣軍分立  
於道左俟其馳驟深入守備銜千總周得魁何紹彩  
等均分伏兩旁合力抄襲賊後殺馬賊十餘名餘賊  
六百餘名賊返入城壘我軍仍駐城外大營計自十  
二日至二十七日共斃僞國宗丞相指揮檢點木一  
將軍炎九將軍等數十名殺斃馬數十匹餘賊甚多此  
陸軍紮營城外高廟屢次獲勝之實在情形也其南  
岸金口之營均共三千餘人五品軍功江得勝千總

李鴻鈞探武昌城內賊匪大隊潛襲金口江得勝帶  
勇五百人堵其前李鴻鈞密約鄉團伺賊於李家橋  
俟眾賊過橋已畢潛以民刦殺守橋之賊即將浮橋  
拆去江得勝攻其前李鴻鈞襲其後賊眾六七百人  
泅水脫去者僅二三十人江得勝身受七傷猶能力  
戰殺賊實爲奮勇二十八九等日崇通之賊又復并  
力窺伺金口生員喻燾之黔勇張于銘之川勇均不  
得力臬司李孟羣於二十八日親督大隊迭次力戰  
身先士卒斬擒老賊百十餘人奪大旗十餘面此二  
十六二十七二十八等日南岸金口臬司力戰之實

在情形也臣思該逆以死拒守已歷數月之久臣軍  
南北渡江徒勞兵力是以決計深入督臣官文派鹽  
道常恩知縣李保邦等克復漢川會兵涇口新溝南  
北之路已通惟此時大局德安尙未得手而南岸金  
口北岸涇口實爲全局關鍵如兩處慎守不失則水  
陸之後路無虞而德安之賊勢已孤矣至水師深入  
險地轉戰十日破賊壘十餘座奪賊艦數十隻大破  
三百餘尊焚賊資糧船六百餘隻血戰尤苦可否懇  
祈天恩先行獎勵水師知府彭玉麟忠勇冠軍  
膽識沈毅坐舢板督戰被礮中斷其腕神色不變殺

賊極多可否

記名以道員用都司銜儘先守備

鮑超請以都司儘先補用并請

賞加游擊銜都

司張啟基請以游擊儘先補用都司銜儘先守備孫

昌凱請以都司遇缺卽補并請

賞換花翎守備

銜儘先千總蘇在位請以守備補用并請

賞加

都司銜守備銜藍翎把總張開榜請以守備遇缺卽

補游擊銜儘先都司李成謀請以游擊儘先補用藍

翎都司銜儘先守備張榮貴王明山均請以都司儘

先升用并請

賞換花翎藍翎儘先守備萬化林

李濟清均請加都司銜并請

賞換花翎外委喻

俊明瞿定國請以千總遇缺卽補并請 賞戴藍

翎六品軍功成發翔易光南均請以把總拔補并請

賞戴藍翎六品軍功外委危廷貴六品軍功梁

昌周得勝韋尙爵均請 賞戴藍翎外委何瑞祥

鄭陽和均請以千總拔補加守備銜并請 賞戴

藍翎其水師陣亡之守備黃開進唐培植千總蔡宏

元把總王席珍王席義外委張輔童玉庭陸洪福金

芝龍六品軍功蔣青海王鳳岐樊丙南何肇昌等均

請照例從優賜卹以慰忠魂其餘出力之員弁勇丁

可否查明擇尤保 奏以作士氣其水陸陣亡弁勇

尙有三百餘名可否查明咨部請卹出自 皇上  
逾格天恩

謹按疏內請獎卹各員於是月二十四日豫奉

旨準

胡文忠公遺集卷二終



胡文忠公遺集卷三

長沙鄭敦謹

編輯

湘鄉曾國荃

陳奏分防金口及回窺寥山匪丁先後潰散現

在迅派將弁收集整理以期補救疏五年八

月十二日

竊臣於本月初三日將圍攻漢陽迭獲勝仗及水師

勞績尤著情形馳奏在案嗣據探稱賊另股攻撲

金口係由江西義甯湖南岳州合以通城崇陽興國

之匪嘯聚而來而以武昌省城之賊應之據署臬司

李孟羣稟稱本月初一日賊撲金口陸營李孟羣親督水陸擊退初二日賊又悉銳而來李孟羣飭令陸營堅守以待賊已敗退兩次復糾大股分作六路蜂擁而來陸營始尙力戰繼乃潰散李孟羣趕調水勇登岸救應因陸勇已散水師亦孤必須撥兵應援等語臣在漢陽城外聞信之餘憤恨已極臣思武漢之要以金口沌口蔡甸爲最著臣五月在金口時兩次雕勦三次迎勦賊已大挫兩月以來不敢復犯金口方冀後路餉道無虞卽擬定期進勦適因北師爲賊所阻德安賊勢復張必須先在北岸打通或可稍分

賊勢又漢陽之麥山等處兵勇屢潰警報頻來前後  
四次分兵援勦江湖開隔往返疲勞遂以陸師三千  
人留防金口並飭署臬司李孟羣管帶仍以水師護  
之臣自率陸師四千人渡江兼會彭玉麟楊馮福之  
水師由蔡甸冒險深入轉鬪而前逼賊安營圍攻漢  
陽力戰二十餘日無如漢口無兵分守漢陽之城未  
能卽下而黃州德安之賊分股來援初二初三日賊  
以下游調來礮船轟臣營帳傷斃臣左右數人適都  
司鮑超以礮船下擊賊乃退走而上游德安應城等  
處之賊復由涇口新溝蔡甸分股下駛鮑超又奮力

回擊焚賊舟十餘隻賊亦自焚所餘之舟登岸下竄

漢口

臣

思內河寬不數丈水師礮船終虞賊焚不能

久泊且漢陽之攻戰方繁而金口之警報旋來臣若

全軍赴援則北岸皆爲賊有欲分軍回救則兩岸皆

覺兵單兼顧無力焦灼實深卽於初四日由漢陽退

二十里駐蔡家嶺以期轉扼蔡甸以待北師而臣營

勇糧已積欠至八九十日不等屢催餉船未到資絀

萬分困於爹山扼要安營而各勇嗷嗷待哺連月以

來不特銀錢久停支發卽薪米亦甚艱難初八日賊

以大股分七八路圍撲

臣

營各勇竟以無糧不肯出

隊臣激以大義督令出師強而後可心終不固逆匪以數千抄後大眾散走臣現在一面督集潰勇暫駐大軍山一面飛催餉項補放口糧副將王國才亦因臣軍潰散移駐軍山一俟齊集整頓再圖分剿署臬司李孟羣因上游新隄新灘口六溪口江面在在緊要應分礮船嚴防並卽稟請親往上游梭巡以昭慎重其彭玉麟楊載福仍以水師力扼下游戰守不懈茲荊州轉解川餉三萬兩因風阻滯於十一日始到臣卽派水師都司鮑超設法另募陸勇或可漸次整理惟水陸各軍欠餉已久杯水車薪萬難濟急三軍

之氣既以此而俱頽戰守之機亦因此而彌窘若非  
援兵大集南北夾攻則武漢之克復難期逆賊之蔓  
延更甚臣調度乖方妄不自揣急攻漢陽深入賊穴  
水師之勞績獨著而陸軍之潰散相仍以一軍分布  
兩岸而兩岸皆潰以一軍兼顧兩岸而兩岸均虛且  
勇散藉詞於餉絀究皆嗜利而忘義如果深明大義  
誓報國恩卽至羅掘俱空亦應忍飢而戰况餉船  
已起解在途食米亦偶有協濟連旬力戰微勞亦均  
記名候獎何至喪盡天良決裂若此總由臣平時訓  
練不力督率無方除將首倡潰散者另行查實正法

並將各弁勇查究辦理外應請將臣嚴行治罪以肅  
戎行惟是武漢情形水師雖尙完全而大局實已危  
迫荊州沔陽岳州等處均恐分軼滋擾不敢不以實  
陳伏祈 皇上天恩再飭川省廣籌兵餉速爲接  
濟則愚臣幸甚天下幸甚

再湖北軍務喫緊臣等餉絀兵散有不敢不盡之心  
而賊勢日猖實非可以飢兵羸卒收功於旦夕者提  
臣塔濟布忠勇至誠爲賊所畏歿於九江賊必大肆  
卽以湖北一省而論急宜徵兵集餉力保荆襄非南  
北夾攻楚蜀合力難期補救臣謹就現在情形而細

審之臣軍藉口潰散卽使收集大半氣已不振亦必不能如從前之敢戰副將王國才一軍更多冗雜湖北舊散兵勇三月以後無所歸東先經減等酌給鹽糧均應大加裁汰夫兵勇之不強患在乎多而不精而餉亦因而久絀且一次潰走卽恐習慣自然恬不爲怪若不因此裁汰則正餉愈分而愈少欠餉日積而日深外侮可虞內訌尤甚終歸潰敗何補絲毫查有水師現保游擊銜都司鮑超勇敢知兵臣已遣往湖南分途另募新兵三千人期以百日堅明約束以圖退來鄂省勦辦又思九江湖口江面旣無水師卽



使圍攻經年賊之往來自便不如并力從湖南北節  
節打通乃可水陸東下合於九江浙江甯紹台道羅  
澤南屢戰有功前此臣會國藩派勦義甯卽擬進勦  
武漢因塔齊布之喪而暫回潯陽應請臣 救下臣

會國藩仍派羅澤南一軍并益以精兵一二千名迅  
速由湖南邊界來鄂會勦若仍株守九江而賊勢之  
橫出旁軼蔓延上游似於大局無補至荊州一府系  
東南一大關鍵 國家設立駐防鎮守立法至爲精  
微惟城兵太單戰守均難分布萬一賊匪窺伺深爲  
可虞應請 救下四川督臣黃宗漢速帶精勇一

二千名親來荊州鄂城一帶堵剿專督江漢之師兼  
理江漢之餉庶臣等得以專意攻戰不虞餉竭且川  
督在蜀道派兵堵禦不如合力攻剿則楚蜀均有裨  
益此臣所擬陸軍補救情形也至賊匪力爭長江之  
險非水師得力不能制其死命侍郎臣會國藩之創  
立水師實爲識時務之要著自舳板入湖九江遭風  
之後下游久無水師故九江湖口安慶廬州均因江  
面賊舟充斥湖港分歧陸軍竟不得手武漢幸有礮  
船而臣之陸軍先潰王國才亦稍稍引退水師孤立  
沌口上游賊蹤已繞出其後餉道旣虞中梗日久恐

被抄襲此時應以力保水師暫屯嘉魚新隄等處以  
待陸軍之再整惟水師十營五哨可戰者半亦有繼  
年未會開仗者月需餉項四萬餘兩積欠亦至七八  
十日不等不如及時汰去怯弱以節虛糜而養精壯  
知府彭玉麟臣曾國藩調赴江西南康總辦內湖  
水師之事臣與副將楊載福面商退屯新隄修船  
隻將各營水師均交該副將親自揀選極力裁汰去  
其十分之三每月可省節餉項免致日久更形支絀  
楊載福力主兵貴精不貴多之論誠爲洞悉機宜此  
又水師之應速裁汰者也臣軍之已散者味良喪心

不準補給欠餉其水師及陸勇之應汰者仍須清償  
已往方可節省將來刻下一軍噉噉殊不應手湖南  
以一省防黔粵江西北數省之賊餉項亦聞久絀  
勢難分濟鄂省江西支應亦煩北路之餉應以專濟  
督臣及臣 欽差大臣之師應請 一敕下部臣指  
撥他省兵餉並請 敕下四川督臣 廣籌糧餉分  
月接濟臣 亦當迅速整頓挑募奮勇務期悉數殲除  
早復堅城以安黎庶而紓 宸廑是否有當理合  
附片具 奏

上諭胡林翼奏整集潰軍籌辦防勦一摺 胡林翼著交

部議處所有首先潰散之兵勇著胡林翼查明卽行正法以肅戎行欽此 九月初一日奉

整頓諸軍援師會剿請 敕川省迅籌軍餉疏

九月初一日

竊臣於八月十二日將金口麥山勇丁藉詞欠餉先後潰散及招集整理修船隻各情形 奏報在案  
臣查武漢今歲賊勢與去歲異去歲之賊勢猖獗利在速戰今歲之賊勢猖獗利在拒守賊求速戰我軍一經得手賊膽皆寒乘勢前進幾如破竹死守之賊則必須糧多兵足分截要隘四面環攻期以時日乃

足以制賊之死命當春夏之交臣力攻武昌乘賊出而與之戰無不勝嗣後賊乃堅守不出臣日事圍攻傷亡過多往往挫我軍氣七月以來臣渡江波湖力攻漢陽自黃陵磯至高廟繞道百餘里力戰二十餘日均有勝仗而漢口得而不守漢陽亦終不下漢口失而德安之賊得與漢陽通金口失而武昌之賊已出水陸之後以久戰之勇潰於一旦誠可惜也現在鄂省賊勢滋蔓又聞湖南已有逆匪數萬人由粵續至竄入茶陵貴州苗疆蠢動漸侵楚界若不及時速剿致兩省賊合則東南大局不可問矣顧兵無應

援則顧此必至失彼餉難接濟則勁旅亦成弱兵與  
據浙江甯紹台道羅澤南稟稱武漢爲東南之樞紐  
上控荆襄南屏楚粵大局所關其形勢百倍於潯陽  
已經侍郎臣曾國藩飭派該道湘勇並添派寶勇由  
南康進發義甯入通城以攻崇陽之賊崇通一定卽  
赴金口會攻武昌等語臣查羅澤南一軍自湖南湖  
北江西迭戰有功兵力最強此軍來援軍威必振惟  
羅澤南本營及添帶寶勇二營據稱月須餉銀三萬  
餘兩水師經楊載福整理裁汰陸師經臣典副將王  
國才分別裁汰水陸尙萬餘人亦月須餉銀七萬餘

兩加以援兵每月共須餉十萬餘兩臣軍不足重  
王國才一軍尤爲冗雜而楊載福之水師羅澤南之  
陸師則東南數省中不可多得之勁旅臣若籌餉不  
周任其久飢則軍心必懈賊勢必張臣罪更大事關  
東南大局安危合無仰懇 皇上逾格 天恩

將臣前奏懇請

敕下四川督臣

黃宗漢廣籌兵

餉於九月十月每月專撥武漢餉銀十萬兩由荊州  
將軍嚴飭後路糧臺道員莊受祺迅解臣營並祈

諭敕四川督臣

黃宗漢督帶精勇一二千名定於

九月內星速抵鄂督師理餉則武漢可以速復而湖



南茶陵湖北德安之賊皆以勢孤無援可速蕩平也  
此乘勝東下埽蕩賊氛可紓  
宸厯

再臣查近年軍務情形籌餉難於將兵董勸捐輸辦  
理釐金尤爲軍需之急務假手吏胥弊端百出非士  
紳出力則經理必難得人昔唐臣劉晏之理財不用  
吏胥而用士類誠爲得法惟是賊蹤靡定風鶴可虞  
求其不辭勞瘁不避艱險隨營辦事置身家於不顧  
者頗難其人臣正月由九江回援卽有湖北在籍主  
事胡大任王家璧漢陽府教授賀青蓮舉人傅卓然  
拔貢生張映芸文生朱輝憲湖南增生曾耀業在武

昌新隄沙市歸洲施南等處設局勸捐試辦釐金設  
廠造修戰艦軍裝火藥礮位當水陸餉缺船隻破損  
萬難接濟之時主事胡大任等倡率親友設法董勸  
旋於各市收集釐金以資軍餉通計費用四萬餘串  
之多實屬奮勉出力可否仰懇 天恩請將在籍

主事胡大任王家璧以員外郎用胡大任督帶鄉勇  
迭次出力尤爲奮勇並請 賞戴花翎教授賀青

蓮請以內閣中書用舉人傅卓然請以知縣歸部儘  
先選用拔貢生張映芸請以教諭歸部選用文生朱  
輝憲增生曾耀業請以訓導歸部選用出自 恩

施逾格以勸後來其沙市樊城及荆襄各屬捐局釐  
金局如果實在出力接應大營不致匱乏再出十分  
別核實 奏請 恩施該胡大任王家瑩二員結  
實廉明應卽飭委總司各屬捐局釐金局務庶使商  
民信服踴躍急公官吏不敢染指市僧不能侵欺實  
於軍儲大有裨益 臣不揣愚昧爲急切籌餉起見是  
否有當理合附片具 奏

上諭胡林翼奏收集潰軍急籌防勦請飭撥兵餉各等語  
已諭令川陝兩省按月酌解數萬兩並令黃宗漢將夔  
巫等處防兵二千名派員管帶馳赴湖北協勦復飭會

國藩令羅澤南帶兵迅往援應矣此次賊匪由崇通興國撲我金口陸營德安應城之賊亦從上游分竄漢口兵勇潰散胡林翼暫駐大軍山收集潰勇加以裁汰並募湖南得力壯勇以振軍威惟湖南募勇尙需時日卽川兵亦恐未能速到著飭李孟羣王國才等力圖整頓不可挫折銳氣使賊勢益張並飭楊載福趕將船隻修脩以資防剿俟羅澤南一軍到楚水陸均有策應庶大局尙可挽回前據載增奏常恩在柘樹口遇伏兵敗以致賊撲蔡店漢陽之匪亦突出抄襲該署將軍欲親赴潛沔堵剿已令官文安籌兼顧著胡林翼等隨時咨商

官文等不致顧此失彼方爲妥善將此由六百里加緊諭令知之欽此 九月初十日軍機字寄

上諭翰林翼奏在籍官紳籌餉出力懇請鼓勵等語此次賊匪回竄武昌水陸攻勦需餉甚繁該官紳等辦理捐輸力籌接濟或修造戰艦軍裝或督帶鄉勇出力均屬著有微勞自應量予獎勵湖北在籍主事胡大任王家璧均著以員外郎用胡大任並著賞戴花翎漢陽府教授賀青蓮著以內閣中書用舉人傅卓然著以知縣儘先選用拔貢生張映芸著以教諭選用文生朱輝憲湖南增生會耀業著以訓導選用該部知道欽此 九月二

十二日奉

陳報援軍大獲勝仗定期會師併攻武漢疏九

月二十一日

竊臣將水陸諸軍嚴爲裁汰逐日點覈軍籍以求簡練陸軍之裁定者已飭深溝固壘加意嚴防水師亦勻撥修艤仍可準備攻剿其南岸石頭關六溪口島口魚馬頭等處爲崇通咸蒲賊匪必竄之路北岸新隄新灘日沙湖等處亦漢陽德安之賊所必爭也輪派水陸嚴密防剿并函知布政使銜浙江甯紹台道羅澤南約期夾剿金日卽行併攻武漢署臬司李孟

羣副將王國才派於北岸步步爲營以冀迎會北兵  
漸圖漢陽臣軍旣經裁去怯弱嚴立軍狀必當深入  
力戰爲客兵之前導而羅澤南由南康疾馳入境已  
先有通城之捷是役也羅澤南參將彭三元遊擊普  
承堯等於八月二十七日由江西義甯州拔營九月  
初一日抵湖北通城縣界之南樓嶺初五日駐營通  
城縣東南湖南紳士五品銜知縣何忠駿李原濬藍  
翎知縣黃崇策藍翎千總方城亦同日以平江勇來  
會駐營通城縣之西南賊之在通城者初不過四五  
千人賊首鍾逆糾聚一二萬人於桂口聞我軍將至

通城以大股之賊來援立木城兩座於西城山巔層布礮眼深掘重濠冀以抗拒我師羅澤南等安營甫畢自率勇士數百人於沿城高阜審視形勢賊見我軍無多突出大隊追襲諸勇回旗擊之殺斃騎馬賊目三名生擒七名賊敗歸壘負固不出初六日辰刻羅澤南與各營會議部署甫定而平江勇爭先殺賊分三路直撲城外賊壘賊以大礮轟擊羅澤南卽飭各營繼進記名道員李續賓候補百隸州李杏春候選訓導劉蓉分率湘勇之右營副右營副中營攻城外賊營以接應平江之勇而羅澤南自率中營繼之



以攻城之西北彭三元普承堯分率寶營雲營以攻  
城之東南候選直隸州唐訓方同知銜候選知縣蔣  
益澧分率訓營湘營以攻城之東平江勇進攻諸軍  
乘之殺斃當先悍賊數十人乘勝奪入賊壘縱火焚  
燒賊悉由西北渡溪而奔我軍分路截殺之溪水盡  
赤城中諸門皆閉惟畱西門以通賊壘畱北門以通  
桂口之路爲諸勇所截無地可逃遂由二門奔入城  
中諸勇盡從而尾追之守城之賊以磚石紛紛下擊  
諸勇多受重傷而勇氣愈倍奪門而入東南路諸軍  
亦攀援而上毀其南門賓陽門各營之勇繼之殺斃

城中賊無算賊復挺而走險從北門蜂擁而出我軍亦奮迅而入城門半開不能多容兩相擁擠賊之踐死於城甕中者正多我軍亦有爲其所踐者羅澤南見賊猶聚於城樓以巨石抵拒因飭諸勇分伏北門外樹林中俟賊之大隊奔出四路截殺有未出者我軍又退伏以俟之再出再截如是者六七次城中之賊乃盡追奔至十餘里之遙鮮得脫者計是日斬賊約三千餘名黃裪長髮賊目約數十名生擒者三百六十名奪賊旗幟牛馬軍裝穀米無數此九月初五初六等日通城大獲勝仗之實在情形也崇陽縣屬

之桂口處湖南江西湖北之邊形勢輿衍米糧亦多  
賊目僞丞相鍾逆義甯州之敗卽於此修土木之城  
跨山引澗袤斜六里意欲據一隅以牽綴三省之兵  
伺兵力單弱之處而乘之羅澤南之行軍也審量地  
勢踰度賊情每多勝算乘屢勝之銳氣不暇休養於  
九月初十日遂由通城直搗桂口適有賊探百餘名  
騎馬賊十餘名前至沙坪遍貼僞諭爲我兵所追殺  
而竄走十一日分三路進攻我軍勢盛賊已不支大  
半宵遁於崇陽分途掩殺斃賊百餘名生擒十餘名  
奪獲軍裝旗幟無數我軍遂奪桂口之險因酌留平

江紳士何忠駿李原濬黃崇策方城帶平江四營駐  
守桂口復調湘南委員劉騰鴻帶湘勇五百以益之  
部署一定卽由崇陽蒲圻節次攻剿此九月初十  
一等日羅澤南由通城至桂口追剿之實在情形也  
援軍一來士氣百倍軍威所至賊膽俱寒所有在事  
尤爲出力員弁兵勇及受傷陣亡者可否仰懇

天恩俯準分別獎卹以作士氣而勸將來臣一面飛  
飭羅澤南從崇陽蒲圻由驛路進取新店金口以期  
會合臣軍速攻武昌并飛催荊州一帶將川省兵餉  
並捐項釐金尅緊接濟

再臣自裁汰水陸以來連旬整飭隊伍已成羅澤南  
援兵有通城桂口之捷羣賊數萬尙圖并聚於蒲圻  
羅澤南由崇陽進剿而出臣當由六溪口迎剿而入  
內外夾攻互相犄角冀將南竄之賊盡殲於蒲乃得  
以專事武漢而我軍無後顧之虞臣於十九日已飭  
各營整隊進剿并飭知縣孫守信以其練勇會於蒲  
圻至賊船已於前次焚奪幾盡所餘無多賊目僞承  
宣張子朋又從安慶湖口下游帶礮船上駛臣一俟  
蒲咸得手卽日率同水陸速攻金口急圖武漢理合  
將進剿蒲圻緣由附片奏聞

硃批覽奏已悉

胡文忠公遺集卷三終

胡文忠公遺集卷四

長沙鄭敦謹

編輯

湘鄉曾國荃

陳報援軍克復崇陽本軍先期進剿先勝後挫

疏 五年九月二十八日

竊臣於九月二十一日將援軍克復通城進剿桂口

定期會師各情形具奏在案浙江甯紹台道羅澤

南於九月十三日自桂口拔營探聞桂口之賊竄入

崇陽於城南江邊之山巔紮大營二座毀城內屋磚

砌壘高二丈壘外掘礮高二三丈以木椿竹籤層布

圍繞砌斷大路以遏我師沿途設伏以圖截殺復於  
城東門外搭架浮橋密約通山之賊數千人入城助  
戰狡兔之計詭譎莫測羅澤南因集各營官會議十  
四日黎明記名道員李績賓以其湘勇右營候選訓  
導劉蓉以其副右營由烏龜石渡江而進同知銜候  
選知縣蔣益澧以其湘勇左營防賊後襲均循河之  
東岸約於浮橋東偏駐營以截賊入通山之路羅澤  
南以其湘勇中營候補直隸州李杏春以其湘勇副  
中營候補參將彭三元以其寶營沿河西岸而進候  
補游擊普承堯率雲字寶營候補直隸州唐訓方率



訓字營居後以防賊之襲尾繞道出城之西北逼近賊營半里許駐營而賊營已包於我軍之中彭三元駐其左李杏春駐其右城乘我師方至營壘未修遽以六七千人自壘中分兩路而來一出山脊直攻我營一出城西迂道以抄我後羅澤南傳令賊不逼營不可與戰以數十人搖旂上前佯敗數次誘賊衝至營旁羅澤南率勇破山脊而下彭三元從左路堵之各殺斃騎馬黃褂賊目二名髮長三尺奪馬四匹又擊斃當先衝鋒賊十餘名兩路之賊大敗回旂狂奔李杏春率勇由江邊而下圍繞賊壘奮力廝殺以截

賊之歸路賊不能復入其壘唐訓方普承堯亦由後路率勇疾進相與追殺賊繞城西北冀由東門渡江以逃李績賓劉蓉蔣益澧突出東岸山內殺出兩岸約其斃賊六七百名賊乃入城閉門自守羅澤南以諸勇遠行尙未午餐飭令收隊賊復以千餘人出城掘修壘外濠溝加釘木椿適蔣益澧於江面搭造浮橋以通兩岸之路羅澤南與之沿江審視知賊佯爲修壘以示堅守實無固志因卽密示東岸三營擇勇八百人西岸五營擇勇一千二百人各攜鼓角鎗礮分作數十隊於黃昏後暗伏兩岸要隘處簡選敢戰

之士數百人於二更時攜沙囊負雲梯拔去木椿竹  
籤緣壁而上拋放火毬火箭擊中帳房多係竹簞搭  
蓋一時火起光燄燭天諸勇層布壘中之賊焚死者  
不可計數兩岸埋伏之勇見壘中火起各擊鼓吹角  
施放鎗礮喊聲震天城中之賊大亂遽開北門而出  
踐斃於城甕者以數百計踰城墮死者無數其得出  
城者又爲各路之勇截殺千餘人屍橫遍野諸勇因  
乘勝入城燒燬賊所落城上望樓搜捕餘匪生擒賊  
匪一百二十餘人卽時正法奪獲器械旂幟無算三  
更收隊將生擒之賊審訊俱稱撲營之際爲我兵殺

斃僞五十二指揮雷春萬僞二十五指揮楊逢芳僞  
總制李姓一名是以速敗前任崇陽縣知縣王國楨  
亦於是日至營協諸紳防勦十五日隨同羅澤南入  
城招撫難民諭令薙髮約集士紳力行團練以圖善  
後此九月十四日羅澤南晝夜急勦大獲勝仗克復  
崇陽之實在情形也至臣之水陸各師於通城桂口  
告捷之後揣度賊情必由蒲咸下竄以與省城之賊  
相通臣因於十九日派陸師三千餘艘船十餘隻由  
六溪口橫入蒲圻地界駐營於車埠以安字營紮東  
面當茅山來路之衝而以質營紮其後鳳營恭營紮

北面彪營紫南面以當蕭橋斗門兩路之衝仁營南營紫於偏西以防新店之路兼以援應各營一面約會羅澤南定期夾攻因岳州防兵進剿微挫且探聞僞翼王石達開以羣賊數萬人上竄盡注於武昌南岸羅澤南之兵極精而少於賊數不止十倍崇陽餘匪搜剿須嚴故援兵不能速至二十二日賊已悉眾山茅山蕭橋兩路分踞我營之前山巒列陣中隔田隴其茅山一股悉眾來撲守備何紹彩尉得魁張寅恭等憑隄抵禦把總張勝奎李文勝率勇應之殺斃當先悍賊數十名賊卽敗退諸勇并力擊之越山嶺

而返另股復蜂擁齊下水師都司銜喻吉三開礮擊之橫截賊腰斃賊百十名賊復退卻我軍仍乘勝追至茅山而返其蕭橋之賊股數尤多儘先千總楊再佑領勇七百人獨當一面匹馬衝鋒揮槊殺賊立斃七人賊畏其勇折回茅山一路以撲何紹彩等之營各營亦奮勇抵禦賊不能支又折而聚於蕭橋一路以撲楊再佑之營楊再佑俟其涉水至半轟斃數十人截殺百餘人賊遂大敗退走我軍自辰至午鏖戰五時正值收隊而賊復折回我軍亦回軍抵擊羣賊蟻至彌山彌谷各營廝殺乘賊勢退卻追入山中其

山後羣賊遂草山而行橫出我軍之後各營已被圍  
繞奮殺兩時乃出重圍傷亡壯士二百餘人軍氣稍  
挫老營及水師各營均無損失此二十二日臣軍先  
期進剿蒲圻在車埠地方先勝後挫之實在情形也  
查是日以三千之勇敵之萬之賊鏖戰六七時之久  
千總楊再佑等雖以追賊深入爲賊所乘究未可因  
賊多兵少坐守不戰默察該千總等敗挫之餘志節  
不衰整飭數日仍卽進剿至道員羅澤南一軍克復  
崇陽其出力員弁勇丁可否懇請  
皇上天恩準  
其擇尤彙案請獎出自  
聖裁

上諭胡林翼奏羅澤南進攻崇陽克復縣城一摺 此股賊匪經羅澤南兩次痛剿收復城池餘黨諒已無多著胡林翼令地方官紳隨處截剿以清餘孽所有出力員弁兵勇均著擇尤彙奏候朕施恩欽此

陳報援軍分剿崇陽餘匪始勝中敗繼復大勝

疏 十月初六日

竊臣於九月二十八日將援軍克復崇陽臣軍進剿蒲圻勝負情形具 奏在案查羅澤南克復崇陽之後因岳州防兵挫於蒲圻之羊樓司慮賊上犯以牽我軍派記名道員李續賓之湘勇右營訓導劉蓉之



副右營知縣蔣益禮之湘勇左營直隸州知州唐訓  
方之訓字營游擊普承堯之雲字寶營移駐羊樓洞  
之西禦之羅澤南自帶湘勇中營參將彭三元帶寶  
營候選同知直隸州知州李杏春帶副中營仍駐崇  
陽偽總制楊萬年者率敗賊據梯木山擾壕頭堡冀  
我師一去復踞崇陽壕頭堡距崇陽四十里羅澤南  
遂於二十二日令彭三元李杏春率其兩營往剿行  
至路口遇賊二百餘當卽擊退二十三日兩營捫藤  
攀石抵梯木山賊悉眾來拒我軍分路奮擊斃賊數  
十名焚逆賊楊萬年之窟而返忽來悍賊六七千登

山瞻望列陣滿山我軍分三路應之左路中路奮力  
同進殺斃當先悍賊賊遂大潰諸勇或尾追或腰截  
賊尸徧野而右路松林之賊愈集愈多李杏春躍馬  
登山整隊以待該逆爲山所隔不知中左兩路之賊  
先潰仍洶湧并進我軍突前擊之斃大旂悍賊八九  
名賊眾反走彭三元督勇橫截而出殺賊最多餘悉  
奔白羊山往咸甯而逃計各路共斃賊八九百人內  
斃僞指揮僞將軍各一名搜獲僞印二顆奪獲大小  
旂幟七十餘件馬二十餘匹及僞制冠服詢據生擒  
之賊供稱此股逆匪不下三萬人逆首石達開統之

由金陵上竄至武昌縣取道金牛昨夜始宿咸甯今  
之戰敗者乃其前隊也二十四日羅澤南以書促彭  
三元李杏春歸營而逆賊大至約二萬人鎗礮環施  
火箭噴筒交下彭三元李杏春見賊甚眾飭諸勇不  
遠追身先士卒擇隘堵殺追至田隴而返我返而賊  
又蜂擁而至如是者二三十合賊一處來則一路應  
之數路來則數路應之彭三元耳受礮傷血流滿襟  
李杏春勸其回營而彭三元戰益力曰今日誓同生  
死雖傷何忍獨歸蓋自卯至申已鏖戰五時之久矣  
賊乃敗退計其斃賊百餘名生擒八名勇丁亦陣亡

六名羅澤南是日申刻在崇陽聞信以從九李續直  
率中營三百人援之並飛調蔣益澧率左營由羊樓  
洞來援二十五日寅刻羅澤南自帶中營二百五十  
人繼進而賊之在咸甯者黎明時已盡數來攻崇陽  
土匪從而附之數倍於前繞營三匝彭三元李杏春  
相與誓曰男兒以身許國死生久已不顧今日誓必  
盡殺此賊各跨馬分路堵禦相持者踰兩時礮子噴  
筒連環迭至彭三元李杏春不少卻賊之另股忽繞  
後路入營放火回馬救之賊眾尾追彭三元大呼殺  
賊手刃黃馬褂賊目一名爲羣賊殺於馬下李杏春

勒馬衝至隨丁勸之走且憤且誓曰彭參將死我何  
獨生爲亦遂殉難其義烈如此把總蕭馥山始終隨  
李杏春左右爲賊所刃把總李光熾居營守輜重聞  
其兄杏春死目眦怒裂同時死之守備銜千總彭獻  
傑藍翎把總胡元則把總劉碧山率中營三百人獨  
當一面與賊力戰賊不敢逼及營中火起遂各執哨  
旂殺入賊中而死是時勇丁以營官陣亡且戰且卻  
迨羅澤南督勇馳援距營十里而事已無及矣列隊  
山岡以集勇丁賊見我兵繼至不敢窮追日暮乃悉  
率歸崇陽時蔣益澧已駐軍城外卽下馬相商以我

師分駐崇陽羊樓兩路兵力本單賊勢方盛必爲所  
乘若專駐崇陽則南路空虛使賊由蒲圻上犯與湖  
北大營聲息隔絕乃定計以五鼓移師羊樓洞并力  
駐守此九月二十二三四五等日羅澤南分勦餘匪  
突遇首逆大股始勝中敗彭三元李杏春等血戰陣  
亡之實在情形也羅澤南於二十六日午刻馳抵羊  
樓洞方命傳餐而大股賊由蒲圻突來澤南與李續  
賓登山審察約二萬餘賊屯聚山巔爲二大枝其一  
枝循山而下踰田隴又分三枝直逼訓營右營副右  
營吹角放鎗黃旗遍野是爲賊之正兵其一掩旗息

鼓草山蛇行埋匿於七里冲山內是爲賊之奇兵冀誘我師禦其正兵而其奇兵襲後撲入我營羅澤南會商各營以我師自崇陽至者血戰三日遠行一百餘里令少息毋遽出戰而令劉蓉率其營以擊田隴賊陣之腰李續賓率其營從左路石山繞出以截田隴賊陣之尾唐訓方則以其營三哨當田隴之正賊以二哨搜其營前山內之伏賊普承堯則分其營爲二路以搜七里冲諸山之伏賊部署甫定而中營副中營左營寶營之自崇陽至者爭請於前誓必報昨仇澤南義之因示以策應之畧賊之在田隴者見訓

營三哨人少直前攻撲我兵按立不動俟賊逼近突以鎗轟之鏖戰移時賊不能敵劉蓉率副右營從中段橫截賊亂反旗而走諸勇圍之不得出其在後者回奔上山遇李續賓右營已繞至山巔截殺蔣益澧率左營策應賊之正兵大敗而山內之伏賊不知也猶躍躍思出中營副中營從左路無賊之處繞出山巔將賊包裹其中普承堯則率其營直從山口分路迎頭殺入老寶營繼之賊之奇兵亦大敗各勇分途追殺十餘里日暮收隊計共斃長髮賊九百餘名內有黃姓偽總制一名李姓偽指揮一名身懷偽印奪



獲黃旗八十餘面馬三十餘匹軍火器械無算生擒  
長矣賊七十餘名訊據賊匪僞國宗韋俊自鄂省率  
賊二萬餘由紙坊至蒲圻冀以抗拒援軍不能下攻  
等語因設彭三元李杏春等之靈殺生擒賊以祭此  
九月二十六日羅澤南會師羊樓洞大獲勝仗之實  
在情形也參將彭三元舊隸前提督塔齊布部下師  
法忠勇稟承方畧身經百餘戰屢立奇功前於克復  
通城崇陽案內擬保副將候選同知直隸州李杏春  
學問深醇日以殺賊爲志節概凜然通城崇陽案內  
擬保知府均尙未稟詳茲以一千三百之眾遇悍賊

數萬始而大勝繼而力戰三日士無退志力竭捐軀  
深堪憫惜彭三元可否請旨追贈副將銜照副

將例從優議卹李杏春請贈知府銜照知府例從優  
議卹守備銜千總彭獻傑每戰必先奮不顧身請以  
都司例優卹藍翎把總胡元則把總李光熾蕭馥山  
劉碧山均請以千總例優卹并請附入湖南新建前  
提督塔齊布專祠以慰忠魂其餘陣亡受傷勇目并  
出力員弁容卽查明彙案分別奏咨懇請獎卹出  
自恩施羅澤南一軍五千人由江西入境連復  
兩城所向克捷因岳州兵挫崇陽賊多軍分而三遂

致申挫移師合勦繼復大勝該道員以新失二將稟  
請交部嚴議之處伏候 聖裁 臣 軍先於二十二

日在蒲圻挫失刻已整理與羅澤南會攻蒲圻卽以  
水陸并進直搗金口理合將援軍搜捕突遇大股始  
勝中敗繼復大勝并懇請獎卹緣由由驛六百里馳  
奏

再湖北爲東南奧區商賈繁庶連年被賊州縣舊商  
失業新集牙行均無印帖查行帖向由部頒到司各  
州縣加具殷實印結請領轉發而外省陋習規費相  
因吏胥中飽究於公費毫無補益 臣 訪察積弊有一

帖費至數百金或千金者忘公徇私比比皆是茲據  
總辦捐輸釐金局紳員外郎胡大任等呈稱新商無  
從請帖可否咨部先行頒給各色行帖二千張令各  
市鎮向捐局按例請領并將從前各衙門陋規一并  
算入正款勸其捐輸給以行帖等因前來惟臣營既  
無利則卽兼署藩司羅遵殿遠在襄陽亦無例案可  
稽應請 敕下戶部頒給各行牙帖二千張并則  
例條款由驛遞發 臣營轉交捐局遞派公正士紳妥  
爲辦理以資軍需如果試行有效再爲 奏請推廣  
杜胥吏之侵漁資軍需之正款既便商情無傷政體

其捐資請領者由總局報明彙冊咨部并札行司道州縣備案所捐成數仍歸於軍餉案內覈實報部又查舊例生監各衿不準充行推原律意士大夫之行不可爲商賈之事所以示節制嚴壟斷也訪查近年弊竇有生監隱名而充行之人有行戶居積而改州職銜之人循名覈實未能盡一應請此後生監職銜人等準其領充以廣招徠其身入仕途名列科第者仍不準承充以示限制而符定例是否有當伏乞

皇上聖鑒訓示

硃批該部速議具奏

上諭胡林翼奏援軍分剿崇陽餘匪突遇大股截剿獲勝  
一摺 此股賊匪現尙分踞咸甯蒲圻著該署撫迅卽  
會同羅澤南合力攻剿以期掃蕩賊氛直搗武漢毋稍  
延緩所有在事出力員弁著該署撫擇尤保奏候朕  
施恩此次奮勇殺賊力竭陣亡之參將彭三元著追贈  
副將銜照副將例從優議卹候選同知直隸州知縣李  
杏春著追贈知府銜照知府例從優議卹千總彭獻傑  
著照都司例從優議卹藍翎把總胡元則把總李光熾  
蕭馥山劉碧山均照千總例從優議卹並準其附入湖  
南地方塔齊布專祠以慰忠魂羅澤南帶兵由江西入

楚境連復兩城此次以少擊多雖致中挫仍復大勝所  
有自請嚴議之處著加恩寬免欽此 十月十八日奉

上諭前據胡林翼奏逆首石達開率賊數萬上竄早慮羅  
澤南兵單不敵恐有挫失已諭知官文派撥精兵前往  
接應覽本日該署撫奏羅澤南一軍接仗情形將士兵  
勇均能奮不顧身以少擊眾惟彭三元李杏春俱衝鋒  
殞命殊爲可惜雖二十六日羊樓洞之捷尙能轉敗爲  
勝士氣不衰究竟傷損精銳皆因兵單所致胡林翼所  
統各軍旣已力加整頓卽著與羅澤南會合直抵蒲圻  
石達開韋俊均係著名悍賊現旣麇聚咸甯卽應合力

進攻能將該逆殲戮則咸蒲一帶賊匪必自瓦解羅澤南之兵本紮崇陽羊樓兩處今既併歸羊樓則崇通後路有何接應此時賊勢甚熾攻剿機宜固不在專守城池而此軍一移誠恐得而復失不特前功可惜抑且後顧堪虞應調何處兵勇以爲後路接應該署撫卽與官文商酌如荊州新到川兵及德安得勝兵丁皆可分撥著該署撫飛咨官文迅速調度羅澤南一軍於剿賊極有關繫而崇通咸蒲又爲江西湖南四達之衝該逆既以全力來抗我軍亦必併力會攻始能得手此處關鍵一得卽可乘勝長驅由金口直趨武漢切勿稍存大意



致誤事機再該署撫兩次摺內均有岳州兵挫之語是  
否係湖南防兵逆賊是否不至上竄未見駱秉章奏報  
並著該署撫將詳細情形附報具奏以慰廑念彭三元  
等應得贈卹已照所請降旨並將羅澤南處分寬免出  
力員弁準其擇尤保奏矣將此由六百里諭知胡林翼  
並羅澤南知之欽此 月 日奉軍機字寄

陳報官軍勦賊大勝會師蒲圻水陸並進疏 十

月二十二日

竊臣於十月初六日將援軍搜捕情形具 奏在案

查羅澤南合師羊樓洞大勝之後軍聲益振以濠頭

堡之役寶營副中營之營官陣亡乃兼管副中營之事其寶營七百人則分隸於游擊普承堯道員李續賓候補直隸州唐訓方之營又調湖南防堵軍功劉騰鴻之湘勇五百人以厚其力擬俟休養旬日卽下攻蒲圻乃崇陽之賊首韋俊自九月二十六日敗後復集殘喘沿途襲脅並添撥逆首石達開悍賊數千共二萬餘人於十月初三日自蒲圻分途來撲其由東路楓樹嶺雷家橋沿七里衝而入者則橫排羊樓洞北田隴旌旗蔽野約萬餘人漸次前進每進數十丈輒止我兵不動則又進進則相與大呼聲震山谷

如是者歷二時一股由千嶂嶺張鼓嶺踰山而來約四五千人列陣於營北韋逆張黃蓋踞山巔按陣不動俯瞰我師一股約二三千人由港口驛循中港而至列陣於葉家山冀以牽制我西面諸營不得併力進攻羅澤南駐營山上審視瞭如示各營以策應之畧飭令賊不逼營毋遽出戰東路一股愈逼愈近忽分三路一路登小石山撲我左營一路據麥園以防中營之橫截一路循山脊直逼右營道員李續賓督勇擊之與賊交鋒殺斃當先悍賊五六人山脊之賊敗羅澤南率中營副中營分三路繞攻麥園知縣蔣

益濃分其左營爲二一登小石山一繞山北抄之一  
鼓而前賊眾大潰溺斃於園外池塘者百餘人竄伏  
於松林密箐中者諸勇繞之截殺五六百人大股由  
田隴狂奔急不能擇散布山谷右營從七里冲之右  
脊而上中營副中營循中脊左營登左脊三路圍剿  
奮登其巔其在山谷者千餘人皆刃之逸出者各營  
又追殺十餘里而後止營北山巔之賊見大股已敗  
猶思據險自固訓導劉蓉率副右營分路仰攻殺斃  
當先悍賊數人賊潰唐訓方率訓營由張鼓嶺橫截  
之槩家山之賊游移觀望普承堯以其寶勇二營暗

擊之賊駭而奔劉騰鴻率陽字營抄其西署蒲圻縣  
孫守信率勇包其左四路截殺尸橫遍野亦追至十  
里外而止計是戰共斃賊二千餘人奪獲黃湖纒大  
旗三十餘面小旗七十餘面馬四匹刀子之棄於道  
路者數千件我軍皆取之以歸生擒一百一十餘名  
據供葦逆受石逆密約奮力攻我以圖上襲岳州石  
逆卽由通城攻平江共犯湖南不料復敗等語審明  
正法此羅澤南十月初三日在羊樓洞大獲勝仗之  
實在情形也十三日臣由嘉魚取道至羊樓洞與羅  
澤南會商密圖進取惟十月初二初三初五等日湖

南平江縣紳士在通城防勦勇丁二千人與首逆石  
達開之賊血戰數日初五日平營被蹋退守平江上  
塔市臣抵羊樓洞與羅澤南面商賊之嘯聚崇通故  
作上竄湖南之勢者不過牽制我師使不得遽攻下  
游搗其巢穴若我軍久駐羊樓洞以堵上竄時日遷  
延適足老師若復轉搜崇通則兵進賊遁兵退賊出  
多方誤我往返皆疲莫如併力急攻直下蒲圻攻其  
所必救也羅澤南之軍與臣之陸軍均於十七日拔  
營前進并約楊載福派水師進紮新灘口牌洲相機  
直下臣仍一面飛咨湖南嚴防不虞庶無瞻前顧後

之慮得以專意進取藉紓宸廑至羅澤南營中出力員弁勇丁可否由臣查明彙案請獎伏候恩旨以昭激勸

上諭胡林翼奏羊樓洞官軍剿賊大勝一摺現在胡林翼已統軍與羅澤南會合著卽併力進攻盡殲醜類所有殺賊出力員弁兵勇著胡林翼彙案請獎候朕施恩欽此十一月十二日奉

再湖北賊勢自秋冬以來大股專注於南岸卽下游金陵皖江之賊亦專以逼脅多人分股上竄爲計而總不離沿江兩岸求所以制賊之死命者惟以精水

師斷賊糧爲先務之要或疑賊之擄掠銀錢聚於金陵財多人眾日增猖獗爲慮臣愚以爲不然自來盜賊之擾害其志專在財利彼豈能以財利予人哉卽至窮蹙忍不能舍固賊情之常也夷考古今平賊之畧必以據上游形勢斷賊糧爲先而財帛之豐歉不與焉武漢則金陵之上游也荆襄關南北之大局而武漢又荆襄之咽喉兩湖及巴蜀之米多於吳會故諺有湖廣熟天下足之語昔年江面安靜米艘蔽江而下日夜轉輸今乃久爲賊阻通籌吳楚之全勢必以武漢得手設立重鎖屹然不可再搖乃會合江西



內湖一軍以水師之全力制賊而下游紅軍巨艦亦  
得并力以扼賊吭惟查水師將才以副將楊載勳爲  
最忠勇廉明每戰必先自道員彭玉麟調往江西之  
後外江水師僅恃楊載勳一員積年力戰肺病日增  
而賊賊之志終始不渝病不言勞功不言賞志誠已  
高出尋常其十營將官如游擊李成謀都司鮑超張  
榮貴等均勇敢冠軍惟未經特將尙待悉心審察觀  
其戰陣之方畧別其才識之利鈍再行詳悉 奏聞  
此則水師將才之宜預籌者也署臬司李孟羣以戰  
船六十隻入湖冬令水涸不能繞出襄河停泊沙市

等處距漢陽尙數百里營中將弁勇目未能精實頗  
難力戰業已嚴飭該司慎守船礮毋許資賊致貽禍  
根外江水師船多礮少取給湖南礮局暫可供用惟  
模範較小不如粵東所購洋礮之美查上年侍郎臣  
會國藩奏請礮位因道梗未經運竣應請 皇

上天恩敕下兩廣督臣葉名琛購運五百斤以上千

斤以下洋礮六百尊派兵妥護交湖南舟運湖北期

以冬杪交付轉交待郎臣會國藩勻配以資異日東

征利用此又礮位之宜預備者也謹附片 奏

文淵閣